

四庫全書

集部

欽定四庫全書

集部

元詩選三集卷五

詳校官中書臣王鵬

主事銜臣徐以坤覆勘

總校官編修臣王燕緒

校對官檢討臣馬啟泰

謄錄監生臣于立

欽定四庫全書

元詩選三集卷五

庶吉士顧嗣立編

柯九思丹丘生稿

九思字敬仲仙居人以父謙廕補華亭尉不就
在太學時遇元文宗於潛邸及即位擢為典瑞
院都事置奎章閣特授學士院鑒書博士凡內
府所藏法書名畫咸命鑒定賜牙章得通禁署
寵顧日隆言者見忌因乘間乞補外自效翼日

御史章入文宗召九思諭曰朕有意留卿而欲
伸言路已敕中書除外卿其少避俟朕宣卿九
思拜泣辭出而中書竟格詔不行未幾文宗崩
因流寓江南至正乙巳得暴疾卒年五十四敬
仲自號丹丘生又號五雲閣吏天厯間與虞李
諸公相唱和及歸老松江時往來玉峰吳閶與
玉山諸君讌遊玉山主人愛其詩類編草堂雅
集以敬仲壓卷稱其宮詞尤為得體議者以為

不在王建下向來藏書家奉草堂雅集為秘寶而兵燹之餘獨缺首卷余嘗以為恨近者朱檢討竹垞偶於琴川毛氏得草堂雅集抄本一冊舉以示余閱之乃首卷敬仲詩也豈文人才士其精光不能磨滅片言隻字有鬼神陰相之而使之聚於所好者與因亟為付刊并採入書畫遺蹟及雜志所見附於卷末都為一集云

宮詞十五首

萬國貢珍羅玉陞九賓傳贊卷珠簾大明前殿筵新一作

初秩勲貴先陳祖訓嚴

凡大宴世臣掌金匱之書必陳祖宗大札薩克以為訓

黑河萬里連沙漠世祖深思創業難數尺闌干護春草

丹墀留與子孫看

世祖建大內命移沙漠莎草於丹墀示子孫毋忘草地也

親王上璽宴西宮聖祚中興慶會同爭捲珠簾齊仰望

瑞雲捧日御天中

天歷元年十二月二十七日都後特穆爾集賽第二日寶房內對舒固爾

齊明埒棟阿平章伊埒布哈右丞大都哈勒巴尚書缺有來典瑞院官吉特巴勒同僉達寶密經歷柯都事

奏十月二十三日上都送寶來的時分興聖殿御宴其間有五色祥雲捧日當殿本院官院判鄭立經歷張符

都事柯九思等與衆於殿前一同仰觀郁郁紛紛非霧
非煙委係卿雲現似這般祥瑞應時呵如今與省家文
書行移國史院標寫入史呵
怎生奉聖旨恁每行文書者

四海昇平一事無常參已散集諸儒傳宣羣玉看名畫

先進開元納諫圖

凡御覽法書名畫
羣玉內史掌之

萬里名王盡入朝法宮置酒奏簫韶千官一色真珠襖

寶帶攢裝穩稱腰

凡諸侯王及外蕃來朝必錫宴以見
之國語謂之質孫宴質孫漢言一色

言其衣服
皆一色也

官家明日慶生辰準備龍衣熨帖新奉御進呈先取旨

隋珠錯落間奇珍

御服多以大珠盤龍形嵌以奇珍曰
雅庫特刺特納者出西域有直數千萬

定者

傳宣太府頒宮錦近侍承恩拜榻前製得袍成天未曉

著來香殿賀新年

臘前分賜近臣襖
材謂之拜年段子

鳳城

一作天街

女樂擁祥煙梵座春遊決

一作夫

管絃齊望綵

樓呼萬歲祥雲

一作拓黃

只在五雲邊

故事二月十五日迎
帝師遊皇城宮中結

綵樓臨
觀之

花明晝錦柳搖絲仙島陪鑾濯禊時曲水番成飛瀑下

逶迤銀漢接清池

故事上御錫宴於萬歲山

儒臣春直奎章閣玉陛牙牌報未時仙仗已迴東內去

牡丹花畔得圍棋

上日御奎章報未時則還內殿矣

玉梳調冰湧雪花金絲纏扇

一作線

繡紅紗綵牋御製題

端午勅送皇姑公主家

皇姑者魯國大長公主皇后之母也天歷二年端午上賜甚厚

并御詩送之

觀蓮太液汎蘭橈翡翠鴛鴦戲碧苔說與小娃牢記取

御衫繡作滿池嬌

天歷間御衣多為池塘小景名曰滿池嬌

珠宮錫

一作賜

宴慶迎祥麗日初隨綵線長太史院官新

進歷榻前一一賜諸王

每歲日南至太史進來歲歷日

元戎承命獵郊坰勅賜新羅白海青得雋歸來如奏凱

天鵝馳送入宮庭

海青者海東俊鵝也白者尤貴有數十金者

玉漏藏機水暗流真珠射日動燈球偶人自解開青瑣

高拱龍牀報曉籌

大明殿有燈漏飾以真珠內為機械以小木偶人十二捧十二相屬每辰

初刻偶人相代開小門出燈外板上直御牀立捧辰所屬以報時

宮詞十首

徽儀閣內製春衣日長倦繡立形闌奚官折送杏花去
笑看玉階胡蝶飛

黃金幄殿載前驅象背駝峰盡寶珠三十六宮齊上馬
太平清暑幸灤都

奉常告吉禴初冬太室精禋一念通傳旨外廷休奏事
今朝天子坐齋宮

闕華閣後春歸早百種名花臘日開為是君王行不到

園官講殿進盆梅

千崑雨過翠玲瓏太液池邊看綠虹何處蓬萊通弱水
儀天殿在畫橋東

中書已奏新除了押寶還催內閣開斜插白麻龍篆濕
近臣當殿謝恩來

高鼻黃髯歎塞胡殿前引貢盡龍駒仗移天步臨軒看
畫出韓生試馬圖

皇心簡注一作在勲臣舊未有人知擬拜除宣索綵牋濡

玉筆榻前先命小臣書

夜深回步玉闌東
香燼龍煤火尚紅
折得海棠無覓處
依然遺却月明中

小時歌舞擅宮庭
長憶先皇酒半醒
白髮如今垂兩鬢
佛前學得念心經

長信宮秋詞

羊車聲遠意徒勞
望斷長門月影高
猶恐九霄風露早
明朝擬送袞龍袍

和許彥溫宮詞

暖吹生香花半吐三十六宮傳笑語雕闌並倚弄新春
翠袿不管霑微雨小娃相對學吹簫雲母屏風白玉堂
中貴傳宣日將暮不省秋閨斷寸腸

漢長門詞四首

阿嬌初入漢宮時金屋承歡春晝遲欲學新妝重覽鏡
如今羞畫翠蛾眉

翠華明日遊仙苑為報春風候六龍妾貌如花番被妬
莫教花貌似奴容

梧桐秋雨滴昭陽不忿燈花故近牀
欲下羅幃宮漏永細看當日繡鴛鴦

名花傾國占宮闈香損僊風傍路飛
却憶夜來宮裏事篋中未熨袞龍衣

題風雨泊舟圖

春風桂楫木蘭舟欲采芳蘅不自由
淺瀨潏潏吹暮雨蒼梧雲冷易生愁

題號國走馬圖

月淡花濃酒半消
沈香亭暖度簫韶
傳宣趣賜飛龍馬
號國夫人早入朝

題金國端箭人馬卷

羶帳雪花寒單于夜不還
分弓傳令肅明日獵天山

題趙松雪畫馬

沙場萬里貳師還
天馬如雲入漢關
當日丹青誰第一
為傳神駿落人間

題小景便面

渚宮正在綠楊西
鳳管龍笙法曲齊
宋玉賦成爭諷詠
荷花深處起鳬鷺

題翠瓶色梅圖

玻瓈瓶暖翠痕深
萼綠仙人出上林
不放春風吹繡閣
妝魂無語畫喑喑

題朱澤民臨李營丘寒林圖

高林曾記舊黃昏
下筆生春畫掩門
劒器低昂動山岳
翠蛾誰解憶公孫

題從子倫畫雪景便面

千山雪月繞漁磯
寒沁船窓酒暈微
魂斷翠禽香入夢
梅花應笑美人歸

題趙仲穆畫桃花馬

桃花出水映連錢
太液新酣綠樹煙
催賜金鞍調得穩
翠華明日幸溫泉

題商壽巖畫山水

集賢曾畫嘉熙殿
勅賜黃金拜舞歸
從此人間重山水

清泉白石轉晴暉

題明雪窓畫蘭

清事相過日應酬
山僧信筆動新秋
王孫遺法風流在

解使平臺石點頭

王孫謂子固子昂昆仲也時雪窓住虎丘寺

筆生沈日新來求書就寫舊詩以寄

沈生筆妙能隨意
曾記蓬萊應制時
三十六宮花漠漠

玉堦研露寫新詞

墨工林松泉來求薦就寫寄

先朝誰進林家墨曾試龍樓鳳餅新玉硯光華雲彩動
殿中書詔賜功臣

贈相士王生

不見王生二十年武夷山下看清泉南柯夢裏猶相問
臺貯黃金可赴燕

就寄筆生溫國寶

千金當日賦長門溫老中書預選掄江上秋霜飛鬢影
怕拈湘管見啼痕

贈周信之教授

霞蒸春暖丹初熟
許我刀圭未暇尋
只在鴛鴦湖上住
杏花種得滿園林

題雪溪逵上人像於玉山草堂

道人曾宿靈隱寺
能畫寺前山意秋
古木立猿啼夜月
下有清泉如玉流

明月歌送僧東遊

上人忤世祇好遊
蹴蹋空翠凌清秋
時人問之寂無語

明月在天惟點頭吳山越嶠皆明月桂影相隨渡東浙
煩師問訊吾故居山近瓊臺瞰雙闕

贈匡廬山人

道人欲築希夷室自向身中煉大丹何日朝元遊絳闕
九霄回首月華寒

題匡廬山人所藏雲松圖於玉山書舍

幽人結屋廬山側臥看九江天際來白雲萬壑青松老
時撫絲桐坐綠苔

題周文矩畫太真攀鞍圖

春風別院奏笙歌
妃子攀鞍轉曉波
不信開元太平日
香魂淪落馬嵬坡

題趙松雪畫挾彈圖

夜合花開晝漏遲
王孫遊騎出平堤
玉鞭緩策青林下
回首風前聽子規

題趙松雪春山圖

落花飛絮春日閒
散策深林獨往還
畫成應對閨人語

好似西湖西畔山

此紀管仲姬畫眉時語也

題趙仲穆畫

山頭應是館娃宮
錦繡樓臺路可通
年年長見五湖水

萬斛舟行白浪中

題文與可畫竹

湖州放筆奪造化
此事世人那得知
楚然何處見生氣
彷彿空庭月落時

按敬仲善畫竹石得筆法於文同嘗自謂寫幹用篆法枝用草書法寫葉用八分或用魯公撇筆法木石

用金釵股屋漏痕之遺意然其生意飛動有龍翔鳳翥之狀此詩所謂生氣非敬仲不能道也

題李遵道春山圖

江上蘭橈倚綠波江頭聽唱竹枝歌使君多少傷春意
新畫青山作髻螺

題李遵道畫扇

江清地僻野人家門外橋通石徑斜不信東華塵十丈
萬山晴雪看梨花

題王孤雲界畫山水圖

滿地山河如繡迴巖樓閣凌風幾度春花秋雨不知秦苑吳宮

題道士黃松瀑詩帖後

道人下筆重黃金尚憶宮牆古木深獨倚闌干揮老淚江山風雨動哀吟

題達蕪善書漁莊篆文

閒居正憶龍頭客喜見秦人小篆文便到山中看摹勒已拚十日臥寒雲

題米元章海岳菴圖

我棄朝歸海岳菴千巖萬壑繞江南先生預擬歸來計
不待臨風雪滿簪

題米元暉山水

帝鄉春日曾舒卷溪館秋風每見之處處雲生山似畫
年年老去鬢如絲

題漁父圖

黃金不用買驂騑十丈紅塵沒馬頭好買扁舟逐漁父

一江春雨看浮漚

題張萱畫橫笛士女

纖手鐫宮徵紗痕薄暮霞畫眉人去後深院落梅花

題黃筌畫紅蕉十二紅

故國三千里名禽十二紅白頭供奉在揮淚溼春風

題芙蓉畫眉

誰道秋容淡名花帶露穠畫眉聲欲碎莫放曉妝慵

題邊武畫蒼松圖

疎竹搖秋雨蒼松凝晚煙王孫歸未得誰復效春妍

題周文矩畫熨帛士女

熨開香霧細裁縫蜀錦吳綾五色穠雲母屏前秋冷澹
自將纖手折芙蓉

題拜石圖

麾斥煙霞世莫儔須江太守獨清流庭前見石即下拜
石若有情應點頭

題王仁壽畫駝

西域降王朝正朔名駝載玉曉連山兩峰殘雪隨羌鼓
萬里流沙款漢關仗內垂鈴珠錯落駕頭蒙背錦欄斑
汝南粉本從何見寧識如今滿世間

題姚婁東所藏平臺寒林圖

古木寒林欲斷魂家山落日近黃昏相從便問桃源路
絕頂人行何處村

題趙子固畫墨蘭

王子當時倚玉樓飄蕭翰墨足風流人間自有清香種

不逐湘纍一樣愁

題所藏趙仲穆畫江山秋霽圖

國朝名畫誰第一只數吳興趙翰林高標雅韻化幽壤
斷縑遺楮輕黃金憶昔京華陪勝集郎君妙年才二十
江南春雨又相逢筆底秋山那可及便欲追蹤僧巨然
破墨爛漫還清妍倚闌人待滄海月懸岨樹拂瀟湘煙
老夫闕愛扁舟趣風靜波深疑可渡顧生癡絕忽大叫
指點前峰問歸路

題李息齋畫竹

仙客揮毫不可招，綠雲猶繞翠綽飄。
天風吹醒丹淵夢，冉冉青鸞下九霄。

深宮雨過長苔痕，誰憶羊車舊日恩。
惟有集賢癡學士，一枝漠漠記黃昏。

筆端隨意長清標，疎葉生風剪剪飄。
羸馬城南看新筍，雨餘初散集賢朝。

使君弭節毗陵日，屏障家家有畫圖。
何似小窓橫幅好，

青鸞雙過洞庭湖

題郭元方畫海棠蛺蝶

名花楚楚近清尊
蛺蝶春生五色痕
金屋瓊窓無鎖鑰
蓬萊飛墜太真魂

題蘇叔黨畫竹石

別墅促煎茶
溪邊路不賒
藍橋曾種玉
春筍出仙家

題武洞清阿羅漢像

天廚送食鹿銜花
口誦恒河沙
復沙獨立虛空無所住

石橋西畔老夫家

題錢舜舉畫杏花

一枝絲杏逞妖嬈
曾鬪東風楊柳腰
金水河邊三十里
落紅如雨玉驄驕

張叔厚白描乘鸞仙

秦臺縹緲近天涯
紅露霏霏隔絳紗
蕭史不歸春欲老
吹簫祇在碧桃花

題周昉畫荔枝宮女圖

驪山宮殿九天開盤出輕紅破玉腮中使傳宣催驛騎
宮娥報道荔枝來

題李遵道畫竹

秋風滿紙老黃華元氣淋漓敲復斜應是黃巖癯太守
青鞵時過楚人家

題溫日觀畫蒲萄

學士同趨青瑣闥中人捧出赤瑛盤丹墀拜賜天顏喜
翠袖攜歸月色寒

題從子倫寫生芍藥于玉山佳處

九十春光事已非
翻堦紅藥尚天機
畫工點染成生色
說與東君少待歸

題王元章寫紅梅花

姑射燕支襯露華
一枝楚楚進天家
君王不作梁園夢
金水河邊厭杏花

題馮子振橫幅荷花圖

水殿風生酒力微
三千宮女綠荷衣
美人應妬華隨去

月上瑤階未肯歸

題盧益脩畫水仙花

煖瓊柔翠曉慵妝
香損鴛鴦瓦上霜
帝子愁多春夢遠
佩搖明月近瀟湘

題宋好古綠竹圖

仙子相邀駕綵鸞
瑤池玄圃拾琅玕
却憐宋玉多才思
貌得森森翠羽寒

題宋徽宗畫柔條雨燕

雙雙紫鸞承恩重立盡柔條活欲栖莫忘六宮春雨暮
珠簾捲處不曾低

春直奎章閣二首

旋折黃甘日鑄茶玉泉新汲味幽嘉殿中今日無宣喚閒
捲珠簾看柳花

春來瓊島花如錦紅霧霏霏張九天底事君王稀幸御
儒臣日日待經筵

退直贈月

西華門外玉驄驕新賜羅衣退晚朝
繡枕魂清疎雨暮
海棠銀燭度春宵

元日會朝

一作朝會

大明宮

軒冕朝元湧翠埃中天雞唱內門開
雲閒

一作飄

五鳳層

樓矗日繞羣龍法駕來謁者引班聯
寶帶上公稱壽進
金杯撞鐘告罷宮花側人指儒冠錫宴迴

次杜德常典籤玉泉寺秋日感懷韻五首

萬騎時巡九月回年年望幸寺門開
兒童不識髯龍遠

猶問君王幾日來

玉殿珠樓漾水光
翠華來幸拂天香
高皇魂魄應思沛
時有祥雲護此方

貝葉空聞馱白馬
金根不復駕蒼虬
當時迎日花如錦
一片人間逐水流

錦纜牙樯天上移
美人爭挽綠楊枝
如今淚灑西風急
採盡蘋花晚欲吹

縈波翠荇牽秋恨
泣露紅蕖落曉芳
惟有舊時西嶺月

自移閣影過朱牆

送尚醫林邦獻歸天台省親

嘗藥事親師華扁玉函方秘得真傳採芝曾斲瓊臺月
煮術時飄碧海煙幾載尚醫留帝里一朝歸省上江船
五雲閣吏今華髮為報桃花洞裏仙

贈醫者徐復菴

人說徐卿有奇術京華視病覓詩酬能知夢裏釣天樂
戲作壺中遯世遊客館守丹和月坐名山採藥帶雲收

有人來問陽初復杜若春風江上洲

送王誠夫赴無錫知州

黃金橫帶爛輝光出守寧辭道路長鵷序久陪蒼水使

鳳池曾赴

一作賦

紫薇郎雙旌坐鎮清溪月列戟看凝宴

寢香肯汲惠山泉見寄青春煮茗當還鄉

題安僧元帥遠景亭

東河亭子憑高爽俯瞰平原繞茂林滄海月生朱拱濕
泰山雲起繡簾陰夢回春渚鐘聲小目倦晴空鴈影沈

誰似詩書老元帥清時於此寫丹心

潞陽客舍和儲生韻

逆旅棲遲筆硯香柳車底事戀文章雲拖鴻鴈生秋色
月冷魚龍湧夜光慟哭有誰憐賈誼形容已老似馮唐
風沙忽遇江南客佳句猶期萬里驤

送秘書掾李道濟之峽州知事

館閣論文久都門出餞遲同為遊宦客忍賦送行詩蜀
道傳鸚鵡江亭叫子規地偏公事少峽外看舟移

送趙虛一還金陵書虞翰林後

詞臣通籍侍金闈天語從容問舊蹊雲外山高龍虎踞
人間松老鳳凰棲翰林擬詔當紅藥道士疏封出紫泥
更賜金錢祠泰時寥陽前殿麗璇題

虞翰林詩并序曰天歷二年三月二十五日集侍立
延閣上顧問集嘗至金陵否集謹對曰嘗到又曰治
亭是汝所題往年八九至其處新松當長茂矣集謹
對曰是未種松時到也近臣奏言道士趙虛一所種
也上曰然已陞觀為宮汝知之乎集謹對曰臣奉敕
題榜賜之矣是日歸虛一來別歸江南即告以聖上
不忘治亭之意又三日吳大宗師持卷來索詩贈行
因錄所得如上云詩曰春明畫侍奎章閣聖上從容

問治亭為報仙都趙真
士新松好護萬年青

送李教授之湖州

水精宮裏尋春處天目山前看月時
隔岼園亭俱可愛
舊時風物未全衰
廣文遊宦詩如錦
博士淹留鬢欲絲
欲謝君恩無寸補
他年杜牧去應遲

送達兼善赴南臺御史

楊花滿隄春已暮
況是都門送客時
共陪鵲鵲方自慰
遠乘驄馬令人思
汀洲水濶生杜若
山驛雲深啼子規

東南此去須行志米斗七千人苦饑

送程鵬翼赴山東運司經歷

齊人富國書猶在煮海為鹽屬縣官千竈飄煙雲樹濕
萬盤凝雪浪花乾西曹儒雅聲華舊東郡司存禮數寬
談笑雲霞公事了大明湖上凭闌干

俞希聲置竹石于几案間名曰小山陰山陰吾之
故鄉不能無題

昔年曾在山陰住不謂山陰到此堂蒼苔翠竹汝所好

白石清泉吾故鄉
禹穴有懷游太史
鑑湖無復賜知章
張帆明日竟東下
雨過西興樹影涼

題錢舜舉畫梨花

洛陽城西千樹雪
走馬看花徧阡陌
金鞭換酒為沈闕
爛醉花前扶不得
粉香薰透詩人脾
思入吳牋灑殘墨
別來風雨難為情
客懷幾度孤清明
壯遊回首已陳迹
一聲啼鳥心魂驚
苔溪居士獲天趣
造化潛移不知處
玉容寂寞澹春寒
猶記香山舊時句
羨君好古清有餘

勵志恥作黃金奴
梅邊握手恨不早
老眼半世空江湖
畫圖詩筆耀當代
大嚼屠門意殊快
更須什襲為珍藏
靜裏春光常自在

題畫蕙

一幹生數花
春風折香玉
持之贈所思
幽人在空谷

題靈壁石

翠滑煙虛小洞天
一辭泗水不知年
君王半醉宣和殿
曾見驚塵落舞筵

題趙承旨墨竹

閭闔風來玉珮珊
洞庭秋入淚痕斑
至元朝士今誰在
翰墨風流滿世間

題唐子華畫秋江亭子

林皋霜老紅初冷
巖畔煙虛翠欲消
記得山陰曾訪隱
一筇秋色度溪橋

題從子倫畫南山曉霽圖

少年曾磻南山勝
畫舫笙歌日日來
第二橋邊春水滿

曉晴芳樹散輕埃

題山谷詠馬詩帖後

道山書閣下階立曾見先朝十二閑
紫翠樓臺秋雨後清
詩零落向人間

閨中詞寫寄三首

階前萱草可忘憂
底事王孫尚遠遊
却笑去年新種竹
錦裯已露竹根頭

物華生意隔湘簾
睡起殘妝思更酣
微笑竟穿花畔去

背人低語折宜男

四月新筍長五月萱草開日長深院靜獨自步蒼苔

烏夜啼寫寄

故宮芳草春日低高林漠漠烏夜啼烏啼不斷愁深閨
萬里封侯安足道玉顏如花夢中老東方欲曙烏飛去
門外落花紅不掃

偶成三絕寫上就

闕

匡廬山人

月華雲影漾中郊光曜紛紜動翠旂玉笛夜吹山石裂

有人騎鶴過三茅

放日輕霞破曉陰
北窓徙倚聽龍吟
光搖翡翠蓬山遠
浪擁玻璃貝闕深

青鳥當時養得馴
碧梧露下覆清晨
紗窓忽見秋如許
應有蛾眉憶遠人

寓題寄玉山

一作浣
花館

溪行何處是仙家
谷口逢君日未斜
隔岼雲深相借問

青松望極

一作
極望

有桃花

玉山書畫樓口占

一作湖光山色
樓酒邊口占

紅顏欲醉倚高樓
玉管聲中桂子秋
如此江山一作湖山如此
不歸去
冷雲風急臥扁舟

姚婁東往玉山因書以寄

相逢何事且徘徊
澤國桃花岼岼開
見說衡陽南去路
秋深無鴈寄書來

春日偶成戲簡玉山人

愛君談笑俱清絕
昨日相逢是幾回
春色不將塵事惱

杏花移得上窓來

姚婁東往武林和玉山韻以送

我欲從君馬首東
錢塘湖上看東風
六橋歌舞歡娛地
萬井樓臺淺淡中

午日有感書寄

紅葵翠艾動千門
惟有蒼梧霧雨昏
離騷歌舞湘妃怨
宋玉如花合斷魂

索陽莊瓜寄玉山

穀雨初乾可自由
荷鋤原上倦還休
醉迷芳草生春夢
誰識東陵是故侯

題釣月軒

談笑從吾樂
相過罷送迎
凭闌看月出
倚釣待雲生
蝶化人間夢
鷗尋海上盟
軒居總一作穩適意何物更闌情

至順初上嘗御奎章閣
太禧使明理董阿中書
左丞趙世安大司農卿哈喇巴爾侍上從容詢
求江南之士臣九思以韓性張翥應詔上曰侯

修皇朝經世大典畢卿至江南刊梓時可親為
朕召此二人者來試之館閣臣九思再拜曰幸
甚後有近臣自南使還者上問此二人其人亦
曰佳士上頗悅後竟因循遂隔今舉事玉山思
之泣然流涕玉山請詩以紀因為四十字以寄
二子云

二美人間少胡為滄海涯文章聯壁貴聲譽九重知宣
室今無召丘園漫有詩蒼梧雲鬣鬣回首淚空垂

題黃荃梅花山茶野禽圖

萼綠仙人白玉冠
霞裙輝映碧雲團
芳禽慣聽吹簫暖
偎徧春叢午睡閑

題趙昌畫牡丹鵲鴿

雕闌玉砌舊承恩
輕吹凝香瑞靄溫
宮女傳言妃子笑
笑看馴鴿出金盆

余舊為顧長卿作梅竹圖
明年其弟仲瑛於姚子
章席上索題遂成口號云

晴雪禁梅蕊春風裊竹枝美人應失笑記得捲簾時

酬陸友仁城南雜詩十首

尺五城南瑞靄浮曾陪玉輅祀園丘太平禮樂逢昌運
親見嘉禾屢有秋

尺五城南神御殿雲籠金碧半天開
萬乘旌旗拂曉來

尺五城南老圃家牡丹如斗眩朝霞
中使人間不買花

尺五城南暖始開
柳林閱武振芳埃
鵬起駕鵠天際落

侍臣闕廟獻魚來

尺五城南憫忠閣
平壤歸來有所思
魏徵不作碑已仆

朝廷久乏諫諍姿
憫忠閣乃唐時建薦
征高麗戰沒之士

尺五城南故國基
武元皇帝有穹碑
苔痕手剝推終始

載記當年備拾遺
金太
祖也

尺五城南可墜田
勢隨高下接平川
十年沃野連千里

能減東吳漕運船

尺五城南古寺深
燕臺陳迹貯黃金
幾回獨立斜陽外
數盡歸鴉月滿林

尺五城南望帝都
孤臣去國意躊躇
篋中尚有忠臣疏
不是相如封禪書

尺五城南話往年
妝臺明月媚華筵
歡娛未了聞笳鼓

岐國雙蛾鎖翠煙

妝臺者金章宗所築以貯李宸妃章宗嘗曰二人土上坐宸妃應聲曰一

月日邊明章宗大悅我太祖皇帝伐金之初金宣宗嘗獻岐國公主以請和故云

題宣和書畫博士李時雍畫渭川煙雨圖

近代何人能畫竹只數熙寧文與蘇宣和復有李博士
亦作渭川煙雨圖圖中蕭蕭風景暮溪谷縈迴森竹樹
深林欲澹蒼翠來暗葉爭翻亂珠度石梁細路人家幽
生涯應比千戶侯老夫對此銷百憂坐覺滿堂生素秋
筆端亦能工破墨直節曾移江上色先朝見之重歎息
吁嗟儒雅成陳迹回首丹青天地窄

寄題聽竹亭

送客題詩學楚歌君歸聽竹楚山阿蒼竿已覺逢秋勁

亂葉翻疑入夢多月滿瀟湘初鼓瑟風回閭闔舊鳴珂
杖藜作伴清心耳惆悵如今鬢已皤

中秋醉後偶作

虞淵日沈羣動息露點蒼苔鬼工泣纖塵不染堪輿清
秋水無痕湛晴碧初若照膽鏡飛上天一壁又如驪龍
珠跳出滄海窟冷光透體骨髓凝灝氣侵人毛髮立年
年中秋事行理孤館殘燈滯他邑今歲居貧家此景頗
自適持杯向月月墮酒舉酒長吞月隨入酒到胸中飛

火車月入詩腸闕水汁眼花忽見仙人來笑語欣然若
相識長笛叫虛寒餘響裂巖石搔首於兩間今夕復何
夕雲中老桂飄古香樹影婆娑印蟾壁天風忽吹散人
月兩俱失玉山倒入無何鄉雄雞聲裏東方白

送倪仲剛遷淞西

我昔少年氣如鵬萬里肩書趼雙足歸來思得人中雄
捫蝨高談破輦俗病餘此事便已廢學向衡門守雌伏
倪君表表淞右來襟宇脫畧無纖埃相逢一笑即傾倒

使我鬱塞怡然開鹽車久矣滯騷駢熟路飄飄簫雲起
丈夫有志在四方出處還應異諸子離筵興濃舟且艤
翠袖吳娃嫩如水清歌三疊動陽闕嫋嫋餘音碧雲裏
願君舉觴不留滴去去功名當努力他時短棹為君住
把酒吳山捲晴碧晚風推出海門潮醉挽雲濤洗胸臆

商壽巖山水圖

老子胸吞幾雲夢賸水殘山藏妙用酒酣時把墨濡頭
收拾乾坤作清供粉黛不寫兒女顏禿兔埽盡江南山

孤峰拔地起千尺凜凜秀色撐虛寒飛泉一道躍靈窟
古樹千株舞煙骨小橋流水隔紅塵中有幽人卧茅屋
衆竒百譎鳥可名筆力到處俱天成王維久死喚莫起
此畫一出疑更生世人飲食鮮知味淡裏工夫屬三昧
屠門大嚼空垂涎口不能言心自醉蹇驢馱我春暮時
觀山仰面哦新詩垂楊修竹夾古道忽有桃杏橫纖枝
浴沂風軟搖輕袂雨過屏山滴煙翠數家籬落近橫塘
牛背夕陽明遠霽悠然對景心無窮冥搜直欲収竒功

貪愛眼前閒世界不知身落畫圖中

雪夜冰琴詩為鄧靜春賦

嶧陽孤桐堅如鐵石上蟠根飽風雪何年雷電驅六丁
曾入深山取蛟螭磳磳擊碎餘孫枝流落塵寰知幾劫
卓哉至寶斲斯器聲滿乾坤擅奇絕雪光照夜三尺冰
落指飛泉響雲穴霜空湛碧來西風老鶴孤鳴下天闕
余生兩耳獲親賞所恨黔驢惟技拙小齋人靜月窺窓
古瓶水暖梅闌香拂衣再拜闕君操恍然挈我天遊鄉

茫茫是身非已有塊坐俄驚柳生肘九原大叫伯牙醒
一洗雷同世間手

趙孝子歌

愁漠漠歌烏烏

一作鳴鳴

哀鴻背雪鳴

一作聲

相呼中原無書

歲復晏有父萬里身羈孤兒欲從之重回首闌中有母

母有姑側立乾坤行

一作去

復止

一作住

浩浩落日明江湖

憶昔方祿

一作保

抱阿耶辭家去倏忽三十年兒今壯已

娶一朝祖母死揮淚青山濕却辭老母踰

一作逝

江淮

一作

湖風沙何處收親骨燕市逢先友迨迨指濱州濱州東

去二千里城南亂處那可求呼一作號天頓地淚成血天

地為之色慘冽一作烈結髮誓死不去此髮解冢開還見

碣兒能裹骨反如墓妻能守志終同穴君不見泣林冬

斲一作出筍卧冰寒得魚古來純孝動天地我詩紀事誠

非虛璽書早暮旌其間

將進酒送九江方叔高南還一作鄔子洲巡檢

君不見瀟湘之浦蒼梧山虞舜南巡去不還當時揖讓

稱大聖但餘湘竹秋痕斑又不見汨羅江水杯

一作頭深

碧玉屈原憔悴江頭哭皇天何高地何厚忠而被讒空

放逐將進酒君莫辭聖賢亦塵土不飲當何為桃華水

暖歌聲度楊柳風輕舞袖垂況是驪駒促行役美人惜

別低蛾眉有肉如陵有酒如海今朝盡醉

一作不飲

極歡娛

莫待重來鬢絲改黃金裝

一作束

寶劍

一作帶

白玉飾琬弓

將軍上馬意氣雄賦詩橫槊踰江東

送陳玉林南還

一作飛龍亭

二首

謝安墩上新亭好玉斧鸞旌記舊一作紀昔遊五采已一作曾

瞻天子氣六龍初一作俄起帝王州元戎談笑收京闕阿

閣論思侍冕旒歸臥滄江今白髮鼎湖雲斷使人愁

龍去亭一作臺空思惘然道人和淚話當年珠宮錫號開

三島金榜承恩自九天花落御牀霑宿霧苔生輦路濕

蒼煙春來怕渡秦淮水處處青林啼杜鵑

送陳孟賓歸九江省親

藉甚聲華翰墨場白雲飛處思淒涼濫分七略陪天祿

因識諸儒載奉常遊客久瞻金闕近歸舟貪看錦屏張
太平天子行封禪莫滯周南歲月長

送趙編修使秦蜀代祠嶽瀆

嶽瀆由來宗祀典歲遣使官達精禋談經暫辭白虎殿
持節非致碧雞神錦繡秦川懷往日兵戈蜀道嗟遺民
歛福蒼生待歸奏未央前席進儒臣

蘇文忠天際烏雲卷九首

山中覆

一作見

鹿拾蕉葉眼底生花二月明不道人生俱

夢裏新詩猶話夢中情

綠窓度曲初含笑銀甲彈箏不露尖人生莫待頭如雪
華屋春宵酒屢添

雲中初下勢如驚白鳳蹁躚雪色翎多少舊遊歌舞地
不堪回首又重經

桃花扇底露脣紅不一作無復梳妝與衆同一曲山香春

去也一作意動茶蘼無語對東風

一顆摩尼不染塵瑤池玄圃度千春寥陽殿裏雲深處

誰是當時解佩人

三月旌旗幸玉泉牙樯錦纜御龍一作清船千官車騎如

雲湧一作擁楊柳梢頭月色娟

長憶眉菴鶴髮翁舊時阿閣贊皇風如今流落那堪說

黼黻文章似夢中

鼓瑟湘靈欲斷魂洞庭風一作波浪不堪論一作聞遙知舊

賜宮袍一作文憲錦雙袖龍鍾總淚痕

興聖宮中坐落花詩成應制每相誇廬山面目秋來好

自杖青藜步白沙

此卷天恩間得之都下余愛坡翁所書之事俊拔而清麗令人持玩不忍

釋手故侍書學士虞公見而題之余攜歸江南會荆溪王子明同余所好攜之而去他日再聞於環慶堂俯仰今昔為之慨然因走筆盡和卷中之詩以舒其悵鬱之氣傍觀者予明之兄德齋淮南潘純金壇張經長安莫浩至正三年夏五月丹丘柯九思書

題雪泉三首

山中積雪清如許況是石磯臨碧湍好似瑤池歸較晚
九霄騎鶴不禁寒

雪裏寒泉噴薜蘿幽人於此可高歌驪山底事融陰火

却與三郎浴翠娥

寒梅幾樹近山堂
暎雪臨流正吐芳
汲得泉歸和雪煮
地爐茶熟帶清香

偶成

蜀江西來春水平
洲渚縈迴春日明
江頭女兒唱歌去
風送楊花迷遠情

有所思

雲帆何處是天涯
遼海茫茫不見家
況是園林春已暮

有誰明日主殘花

初夏即事

綠楊嫋嫋雨初晴
浴罷蘭湯尚宿醒
簾卷流蘇通乳燕
薰風樓閣看生成

山館

山館無人日日開
巖深林密曉猿哀
移文恐到人間世
羸馬春風獨自來

記夢

月色如銀滿碧空扶搖九萬躡西風夢魂不解寒生粟
直與秋毫挂影中

送澤天泉上人

湖外三天竺溪邊九里松禪心秋寺月詩思晚林鐘
齊已名無敵支郎說有宗京華同惜別澤國幾時逢

送林彥清歸永嘉

鴈蕩接銀漢翠湧生高寒芙蓉散秋錦飛落秋雲端
我昔造絕頂天濶路漫漫遙瞻廣寒殿素娥正憑闌
白兔

擣月魄指顧成神丹因招宋成公吹簫乘紫鸞俯視九
萬里元氣清團團別來知幾時弱水如平灘忽遇鴈山
客霞珮青蓮冠還入鴈山去玉髓供晨餐報我舊遊者
久待凌煙巒吾患為有身南望空長歎

春日病起看花走筆呈座上諸友

幾日不出門花開已如許錦繡薄流霞臙脂透疎雨煖
生蝴蝶夢風淡鴛鴦浦底事遠遊人鷗邊蕩柔櫓

秦長城

驅車出長城，飲馬長城窟。朔雲黃浩浩，萬里見秋鶻。白骨渺何處，腥風卷寒沙。蒙恬劒下血，化作川上花。祖龍一何愚，社稷付征杵。長城土未乾，秦宮已焦土。千載不可問，似聞鬼夜哭。矯首武陵原，紅霞滿川谷。

半月樓

蛾眉山色凝秋碧，山下雲連鏡湖濕。萬里青天月半規，十二樓頭夜吹笛。滿庭桂樹，仙人家玉兔，搗藥來紅霞。青蓮居士下東海，祇在蓬萊埽落花。

賦花上月送沃州良上人

林園念良會花月含清輝
娟娟媚繇萼皎皎澄芳姿
臨池春弄景轉樹夕藏霏
凝香翡翠蓋散影沾羅衣
飛觴昔忘曙秉燭貴及時
欲隨支遁發行樂願無違

漢宮祠

漢宮花發亂鶯啼望斷霓旌意欲迷
莫種梧桐貪倚翠雨聲長在玉階西

送王止善入京

君到金華怯暮春
御溝波暖綠粼粼
城南牡丹大如斗
馬上葡萄能醉人

太白畫像

玻瓈漱澱酌葡萄
獨擅瑤臺志氣高
院吏持歸青瑣靜
海棠移月上宮袍

米元章畫像

寶晉齋中春日長
舊時宮硯墨痕香
海棠花發黃鸝語
臨到蘭亭第幾行

題光孝寺訥無言長老所藏宇南畫龍

道人畫龍龍絕奇何處人間曾見之上京清暑朝初退
太液池邊看雨時

墨竹

生意滿孤根香凝粉節痕驚看雷雨夕化作老龍孫
題汲水美人圖

汲水立銀牀照見紅妝影王孫殊未歸寶釧霜花冷

題綠竹

江南撥鐙法寂寞冷天涯阿誰春雨後貌得翠蛾眉

題李伯時畫馬

聞說龍眠畫曾師十二開桃花晴泛水首着曉一作晚連

山蹴月馳周道嘶雲入楚關驍騰萬里志顧影落人間

題趙子昂詩卷三十韻

江漢龍船下東南王氣收求賢垂睿略為治訪嘉猷使
者班纁幣王孫覲冕旒未央疑露掌東序薦天球顥氣
凌風上祥光近日浮看花陪堆尾視草近螭頭清曉還

聞履嚴寒或賜裘宋公周有客項伯漢諸侯人仰文章
貴身承禮數優五朝通內籍九命擅清流昔滯京都久
時從几杖遊通家憐我慧對酒慰羈愁妙墨時相贈新
篇不厭酬風流追鮑謝文采駕枚鄒心慕歸來好官因
老欲休倚闌秋待月攜客煖經丘歌罷聞啼鳥機忘玩
狎鷗苕溪今寂寂松雪自悠悠馬鬣遺封在龍驤待詔
不斷鱣人共賞隻字世爭售揮翰能兼美評量此莫儔
調高鏘玉管筆健映銀鈎江海蒼煙暮湖山碧樹秋賈

充能誤國王粲漫登樓花落渾無賴春歸不自由蜀牋
臨別墅英穎勝他州揮灑真成癖吟哦可解憂鍾王多
韻度李杜極深幽入室能攀踐趨隅恨阻修錦標連玉
軸把卷共綢繆

送黃鍊師

榴皮書壁走龍蛇池上芭蕉又見花北闕恩承新雨露
西湖光動舊煙霞春風日長玄都樹秋水星回碧漢槎
修月功成三萬戶蕊珠宮裏誦南華

春直寶閣

寶章金鑰直承明袖捧祥雲曙色清親侍鸞輿中道發
旁趨冠劍兩街行洞房夜景搖珠箔別殿香風度玉箏
萬物盡沾忠厚澤苑花深處聽流鶯

顧愷之瑤島仙廬圖

虎頭有三絕丹青尤擅長崇峰騰碧靄斷岼跨朱梁蘿
結藏真館花明屏息房廣成參道訣黃石悟心方瓊樹
依巖末青芝立澗傍山童持玉簡羽客佩琳琅應見遊

麋鹿翱翔起鳳凰
丹梯縈百折仙路
夔非常泉落衆山
雪虹飛千錦張設
施神秀發點綴韻
清揚金石歸天府
璫瑱豈鴈行應知
還聚散今再屬珍
藏夙覲仍非偶悠
然入化鄉

關仝秋山凝翠圖

關仝善繪事上宗
洪谷師長素寫幽
興宛似清秋時天
高氣為肅野曠山
自奇鬱鬱青於染
巍巍翠欲垂遠邨
人語動近水漁梁
支霜飛萬木變風
冽千家稀空江渺

無際虛閣客有期深情歸慘澹淺絳多媚姿宣和昔年
襲人世何時遺子虛愜所慕把玩常在茲會合不易偶
聚散聊自怡書罷爾攜去何禁神為馳

范寬江山秋霽圖

華原范中立深得丹青要仙遊幾百年聲譽尚流耀圖
成三尺鱣曠遠多詩料山回起蠶叢水漲沒寒潦落葉
入空江清暉映丹嶠歸人望故原栖禽集蒼篠輕舸泝
中流虛闌挂斜照髣髴瀛海間無限足清眺何如荆與

關奚讓唐吳道媿余涉黃塵未得無聲與片語何足論
臨風付長嘯

王叔明天香書屋圖

潁川有高士落落無常居不愛城市遊乃向巖壑廬開
牕俯西埜縱目聊自娛青山望中來白雲與之俱森森
芳桂林濯濯朝雨餘良時會佳朋尊酒散襟裾豈無榮
寵念窮達各有途山來不必麾山去不必呼仙人王子
蒙揮灑作新圖幽游自有趣奚必谷名愚

趙仲穆秋山訪友圖

萬壑寒蕭森千章樹蒼老溪錦新織成雲天初脫稿茅
屋倚幽叢鹿麋臥深草呼童埽綠苔晏坐聽黃鳥江山
如有情展卷舒懷抱囊琴為尋幽不辭涉深窅疎林間
紅葉遠遠出山杪煙靄互吐吞恍若籠輕縞從來趙王
孫胸次有三島置之青玉几雲霧時旋遠變幻為虎踞
光怪疑龍矯只此一洞天愈探愈不了山形雖渾成石
貌實妍巧宛然山陰遊萬狀難分曉骨力故清竒因知

得名早

陸探微員嶠仙遊圖

員嶠方壺戴斗極，疊嶂橫陳開碣石。
翠崖丹磴互低昂，複閣層闌轉空碧。
碧桃花落笙聲幽，雙成吹玉彩鸞謳。
跨鳳騰雲去無跡，清猿啼斷層崖秋。
霞光隱映山長在，寰海茫茫隔煙靄。
舊遊仙侶漫招呼，誤落人間幾千載。
吳爭越戰何可數，束書何問桃源路。
畫圖空見避秦人，隔水漁郎不相顧。

閣立本秋嶺歸雲圖

唐室閻公多雅度政暇舒懷染豪素重疊青蒼百丈山
參差紺碧無窮樹白雲一抹時還來陰翳千林忘朝暮
仙家寂寂野禽啼板橋歷歷行人赴迢遙白水接荒邨
蕭瑟黃蘆鳴古渡當年畫手不乏人誰似閻公能武步
宣和寶愛什襲藏御筆親題尚如故屈指於今七百年
一失一得真有數清容先生欣購之倒橐傾囊愜所慕
吾儕何幸入奇觀滿目氤氲起雲霧固知作者有深思

蕪詞何敢輕相附
摩挲繼晷未能忘
慚余亦有煙霞痼

王維輞川圖

豬龍兒嬉錦綉好
三郎歲晚懽娛老
阿環姊妹擁華清
朝士宮前誰敢到
右丞脫却尚書履
布襪青鞵弄煙水
藍田別業堪畫圖
矮本丹青自遊戲
華子岡頭輞口莊
湖亭竹館遙相望
小橋摺轉青紅窻
樹巢歷歷煙茫茫
藥家瀨前兩舟上
柳浪一尺清風狂
詩成相與和者誰
我家裴迪無能雙
丘壑風流固如此
安知畫外清涼意

卷五
凝碧池頭天樂聲白石累累淨如洗亂後歸來舊第中
玄牆綠戶老秋風人生過眼皆夢境乞與山僧開梵宮
半幅吳綃如傳舍俟誰得此千金價客來寒具莫怱怱
三百年前御厨畫

上馬

眼昏身手鈍上馬怕風沙只好扶藜杖循籬看菊花

虞雍公誅蝥賊虞伯生書

因讀誅蚊賦深憐愛國情三公登間謀四海失昇平早

覺文章貴爭期德業成雲仍蒙世祿翰墨負時名

幹馬圖

圉人扈從溫泉宮曉汲清波浮

闕

驂騑解語意相得

肉駿振動嘶春風天子臨軒催羯鼓

闕

茵檀板登牀舞

美人盼睐相輝光那復臨邊思報主潼關夜半烽火明

錦綸兒來坐大廷此馬棄捐何足道顧影長城厭水腥

題黃鶴樵叟竹石

風落湘江秋正波重瞳消息竟如何竹間猶有斑斑淚

應是英皇恨更多

黃大癡縹緲仙居圖

玉觀仙臺紫霧高
背騎丹鳳恣遨遊
遨遊雙成不喚吹簫侶
閨苑春深醉碧桃

菊山詩贈吳興黃君

菊蕊逢秋放山居可醉眠
落英敲石冷佳色傍雲鮮
舊摘煙蘿外新栽水竹邊
思君多道味何日共攀緣

岳王墓

結髮行間見此公兩河忠義俟元戎勲成伊呂終方駕
箕勝孫吳亦下風拂劍未酬千古辱賜環空壞十年功
奸邪賣國堪流涕獨立西風看去鴻

方方壺雲林圖

仙人危太樸屏跡雲林間河車運金液九轉成大還苦
辛三十載得道鬢已斑弱水政清淺蓬萊那可攀嬌娥
貯金屋霜露零秋山勿猜松柏操不及桃李顏

王叔明雙松圖

碧眼支郎耳更聰
軒楹占斷白雲中有聲聽到無聲處
錯認長松是老龍

玉山佳處

神人夜斧開清玉一片西飛界溪曲中有桃源小洞天
雲錦生香護華屋主人意度真神仙日日醉倒春風前
手揮白羽扇口誦青苔篇袖拂劒山雲足躡藍田煙飄
飄直向最佳處漱潤含芳挈琪樹世間回首軟塵紅不
須更向蓬萊去

題趙鷗波古木竹石圖

水晶宮裏人如玉
窓瞰鷗波可釣魚
秀石疎林秋色滿
時將健筆試行書

題高尚書秋山暮靄圖

三代以來推盛世
九州之外有斯人
君看筆底生秋色
盡在瀟瀟楚水濱

題倪幻霞良常草堂圖

幽館曉山如沐
斷橋春水初生
花下班荆酒熟
松間散

策詩成

自題晴竹

歲寒有貞姿孤竹勁而直虛心足以容堅節不撓物可
比君子人窮年交不易暕暕桃李花旦暮改顏色

李思誨柳浪輕舟小景

曉煙如幕柳垂絲曲曲春塘望欲迷一箇輕舟仍載酒
赤欄橋外聽鶯啼

楊昇蓬萊飛雪圖

仙山一夕遍瓊瑤萬木森森長玉苗處處樓臺相掩映
素娥白鶴正逍遙

荆浩秋山仙侶圖

奇峰迴合映林光霜氣殷殷滿竹房知有高人山外住
故攜綠綺入崇岡

盧鴻蓬島仙遊圖

蒼崖千丈有雲封劉阮何來策短筇行過石橋看急澗
一聲野鶴出長松

韓幹雙馬圖

渥洼自昔產龍媒何事開元萬騎回
千載韓公稱入室恐驚風雨未應開

題危太樸所藏滎陽鄭虔畫秋巒橫靄圖

虎頭昔日稱三絕孰謂新圖見鄭虔
紫翠虛無晴嶂裏青紅掩映夕陽前
從知嘉賞歸明主應許神工邁昔賢
滿目秋光無著處此身疑在碧雲巔

題危太樸所藏李昭道畫春江圖次蘇東坡韻

春江淼漫百疊山晴煙籠山山吐煙望君拄笏聊騁望
但見一氣長蒼然千章綠樹倚茅屋復有澗谷奔寒泉
商舸迎陽泊沙岸布帆吹籟彌平川李侯生前得此景
骨格更出探微前胸中八九小雲夢筆底萬頃滄浪天
鉛丹金碧世希有晶瑩不讓蓬瀛妍江樓掩映臨江碧
時見輕鷗落渚田此圖此景有神護小住人間七百年
摩挲絹素開黯淡飛舞妙思藏便娟臥遊齋頭一展看
恍若身對湘巫眠鼎湖髯挂李侯去飄然久作芙蓉城

內仙鄒陽後身薄自曉舍我誰結三生緣嗚呼江煙幻
滅在俄頃短詞聊次東坡篇

題荆洪谷楚山秋晚圖

峰迴留深隱天青襲素袍棲身斷人跡游目送鴻毛樹
挂栖霞驚藤懸飲子孫龍眠石澗冷虎撼樹根牢野客
吟時共山翁奕處遭浮雲過水盡孤月挾霜高羽使來
三島胎仙舞九皋左招玉斧飲右攬赤松邀空色收寥
廓虛聲起驛騷彈琴遺古散問字度危橋遂向圖中見

誰能世外逃
乘槎幾月至一泛九秋濤

題趙幹春林曲鳴圖

風暖柳仍綠
春晴花更濃
高低茅屋靜
遠近碧溪通
亭白分湖色
山青隔岸容
村翁無俗慮
相過說年豐

題黃荃蜀江秋淨圖

蜀江昨夜雨
初歇兩岸青山淨
如拭疎柯歷歷間
青紅古渡何人相
向立扁舟呶啞過
江來酒家猶掩門
未開數聲雞犬知
誰處浩渺東流不
復回萬竿脩竹鳴
蒼玉

怪石巉巖倚茅屋驚濤震盪戰馬奔不動山翁臥深谷
江山盡屬掌中看畫圖莫作尋常觀成都要叔留妙筆
一縑秀色若可餐堪歎宣和藏匪固杜鵑啼斷天津路
何知散落向人間猶藉清客加襲護吾儂幸爾相遭逢
誰數當年有項容臨窓展對未能已祇覺颯颯來松風
題吳瑩之所藏郭忠恕畫冊

恕先非漫士却擬閑瀛仙資稟山靈秀胸羅錦繡妍居
周聲譽重仕宋位名遷篆隸宗前哲丹青邁昔賢觀樓

殊壯麗雲水自澄鮮泉落千重壁峰迴萬井煙春秋仍
變幻揮灑更悠然啄木藏深樹鳴夷釣碧川歌聲振林
表笑語出花前御舸乘紅粉扶留挂綠錢素縑盈咫尺
妙境總堪憐一入宣和襲千秋取次傳故人持過慧續
尾愧殘編

李成江邨秋晚圖

萬壑秋風木欲空流泉屈曲竹叢叢山家已露炊煙白
鳥雀初歸夕照紅籬落喜無車馬跡柴門時有故人蹤

桃源漁父知何處未若茲圖景最工

王晉卿萬壑秋雲圖

千山迴合平原少雲去雲來忘昏曉絕澗奔飛萬壑雷
丹楓蕭瑟一林鳥獨坐長吟是阿誰蹇驢騷客行遲遲
何來征舸江頭泊無限秋光屬爾為

題郭忠恕夏山仙館圖

碧樹沈沈覆草塘湘簾齊揭藕風涼人間無地逃炎暑
安得移家住上方

奉題文與可十竹圖二首

過雨湘江翠羽攢
舞風清影玉聲寒
當時嵇阮人何處
留得高標咫尺看

湖州仙去幾經年
十竹新圖屬世傳
點點墨花金錯亂
離離月影鳳翎騫

題趙令穰秋邨暮靄圖四首

遠岫千重青似染
平林一望錦成堆
迴塘漁艇不歸去
谿上數家門半開

谿上數家門半開
邨翁傍晚却歸來
霜林掩映芙蓉色
秋水微茫鴻鴈哀

秋水微茫鴻鴈哀
短橋曲渚錦林開
疎林欲下斜陽色
一抹青山入望來

一抹青山入望來
滿林秋色總詩材
宣和當日珍天府
未許騷人費品裁

米芾真蹟

樹色模糊蘚逕平
人家只隔水泠泠
白雲不解龍嵒去

遠却峰巒一半青

趙千里畫長幅

神區何處有此山盤迴聳峙如髻鬟安期曾於此鍊液
瓊柯鬱秀非塵寰白雲擁戶不須掩紫霧臨窓未許闌
朱樓縹緲足舒眺虛亭幽絕時躋攀珠簾輕揭青鸞舞
畫舸徐牽白鶴還溪迴時有飛瓊度橋迴常憑弄玉扳
絳桃亂落無人埽瑶草叢生若箇刪山中勝槩何可數
流泉瀲灩空潺湲誰能摹寫長圖好伯駒筆妙趣自閒

固知作者有深思展卷情馳未擬還先生寤寐何時已
晴窓對閱娛心顏陶貞白在何處胡不同來此中住仙
家自昔忘歲年長嘯拂衣自來去

題趙千里畫八幅

數幅晴雲翠袖千重碧樹瓊樓羨殺承平公子筆端萬
里瀛洲

題馬遠虛亭漁遂圖

五月江南雨乍晴看山如在畫中行隔谿簾幕初飛燕

灌木池塘獨聽鶯
暑向昨宵風雨盡
詩從今日筆紋成
晝長睡起無何事
驀送滄浪漁笛聲

題危太樸集八大家

諸君揮染映空碧
十日一水五日石
春山秋樹綠更紅
板橋野屋橫且直
煙雲翳鬱風雨交
夏木重重氣猶濕
山花若笑山鳥鳴
五馬驍騰僅盈帙
古岸疎林秋氣清
石澗飛流疑咫尺
老來看畫眼枯澀
便擬買田谿水側
脫去賜帶繫芒屐
著書五車刻苔壁

題鄧善之集十大家

展畫能銷夏何如此更深匡廬雲互湧湘水雨生陰粉
豔知春色林疏識暮心羨君幽致好不必費遐尋

題黃子久為姚子章卷

空巖花落滿林香古殿松陰入座涼清絕右丞名獨擅
精妍北苑派何長寂無雞犬鳴晴晝時有煙雲遶上方
賴是一峰傳正脈故將沖澹洗濃妝

題黃子久為徐元度卷

一峰老人嗜泉石八尺素繡寫秋色頓使窓頭開翠微
復令篋裏流丹碧翩翩逸興殊未已更撥苔文青可指
擺脫驪黃見神駿洗盡鉛華出西子徐君那得不破顏
此身如坐清冷間未損嘉賓一日索買盡沃州千萬山
吳中好事家相屬得隴何人堪望蜀斷無明月映連城
或可崑岡矜片玉君不見開元王右丞南唐董北苑丹
青一片流至今前輩風神更超遠一峰固是餐霞侶知
音未敢輕舒卷

題黃子久吳門秋色圖

幽人來往吳中道獨棹秋風海上仙何處歸颿頻倚岸
幾家茆屋傍流泉水禽欸欸集深渚夕照霏霏媚遠天
點筆忽驚埃壒外恍疑身在輞川邊

題梅道人為伯理十幅

雲溪吳仲豈凡儔寫得湖山數幅秋良夜漏沈呼剪燭
不知風雨下前洲

題曹雲西畫卷

東吳高士雲西客愛染長箋淺深墨空濛不記山幾重
萬樹疎煙氣猶濕漁人舉網溪流清野老何來歎素情
上方鐘磬出雲表歸帆影落空江明前邨雞犬日已暮
黃葉秋風滿山路箇中妙境壓古人三復摩挲未能去

題董北苑畫

樹密重重萬壑深清溪泱泱更穿林行人曳杖頻回首
隔岸黃鸝送好音

題李成秋山圖

蕭蕭木葉落欲盡渺渺洞庭生白波杜老因悲秋事晚
山翁斜日望蒼螺

題王晉卿釣魚圖

雨歇見春山荻蒲第幾灣鷗來又飛去只有釣舟閒

題趙千里春景

朱樓不識有春寒隔岸何人盡日看為惜年光同逝水
肯教桃李等閒殘

題趙伯駒畫

車轍轉轉過別山滿林霜葉映紅顏晚來仍起雲千疊
一片幽閒指顧間

趙子昂畫夏景倣王摩詰次韻為素清客學士

山樓開處映晴霞消夏虛明水閣斜雲影倒窓思泳藻
松風吹落鳥銜花

題趙子昂倣張僧繇筆意

寒雲淦淦碧峰攢木葉驚風下急湍何處山人殘照裏
罷琴猶向隔江看

題趙仲穆畫

草堂仍著薜蘿遮
地僻林深有此家
只道春風吹不到
門前依舊落松花

題黃子久海嶽菴圖

元章翰墨世稱良
近代癡翁更擅長
海嶽尚餘清勝在
一江秋色兩微茫

題黃子久虞峰秋晚圖為太樸先生

古樹盡歸秋色裏
人家常在水聲中
數行旅鴈入雲去

一簇招提倚碧空

題黃鶴山樵劍閣圖

天梯石棧自相鉤
造物玄功筆底偷
挂起碧窓相對處
滿堂風色劍關秋

題畫

古木槎牙知幾年
一叢修竹翠依然
空山莫道多寥落
自有春風到日邊

題畫二首

春濃不放小禽棲白髮衝冠向晚啼簾幕半開人未起

樓臺風暝日猶低

右白頭

春風嬌軟綠陰肥上苑鶯花紫翠圍却向後宮深院裏

一枝閒自理金衣

右黃鸝

劉致時中集

致字時中石州寧鄉人父彥文字子章著有玉

亭小橐歷官廣州懷集令卒權殯長沙大德戊

戌姚文公燧遊長沙致自狀其先人懷集令之

出處正銘幽墟且手所為文取正焉燧讀之盡
卷賞其為辭清拔宏麗為之不已可進乎古人
之域因為之作墓銘致初任永新州判歷翰林
待制出為浙江行省都事卒貧無以為葬王真
人壽行躬往弔哭周其遺孤舉其柩葬於德清
縣與已之壽穴相近春秋祭埽不怠詳見陶宗
儀輟耕錄

對月

涼霄在前墀佳月墮我側此月如此心曠朗一片白開
樽起相娛佳月即佳客月如感知已為我好顏色此時
還獨醒奈此明月夕

題錢玉潭竹林七賢圖

并序

往歲居建康青溪第一曲與蒼筤谷相對憶竹
林衆君子故有此作今觀圖遂書於後

門巷寡輟跡靜對溪南竹溪水淨堪染竹色與分綠有
時澹相向襟抱如瑩玉安得萬蒼筤遮植青溪曲豈無

嵇阮輩遁世尊往躅浩歌日酣燕達生亦云足

青樓曲

峭寒暗襲雲藍綺
蛟帳悵悵夜如水
美人骨醉紅玉軟
滿眼春酣不忺起
幽禽關關喚霜曙
金壁屠蘇溢香霧
有生只合老溫柔
璧月長教挂瑤樹
鴛鴦同心暗中結
滿意芳蘭煖紅雪
癡雲駭雨自年年
不管人間有離別

秋雨吟

濕螢閃光飛不起
八尺風漪夜如水
仙姝不眠肌骨清

起馭夜涼吹玉笙曲中忽作孤鳳鳴天帝感泣秋雨零
旱龍喝死嗟莫及坐見扶桑落葉濕前溪水高龍夜吟
不管西郊老農泣

淮南歌

甓社湖中出明月斯須千山萬山白燭龍馳影不敢眠
淮上風煙黯無色鼉鼉起啼鰕鱗舞荷風驚濤戰南浦
湖天無光湖水立夜半行空灑飛雨東方搖搖天欲曙
畢逋啼老扶桑樹淮天幽幽澹空素老蚌潛輝寂無處

古采蓮曲

長安女兒淑且濃，日日采蓮溪水中。
笑插荷花照溪水，韶容欲與花爭紅。
溪中荷花深幾許，溪上時時聞笑語。
紅酣綠縵不見人，應在荷花更深處。
歸時夜涼溪水清，扣舷踏歌蕩槳行。
花葉蓋頭花鬢髻，溪上月明潮已平。

望夫石

一作磯

望夫山頭日欲頽，望夫山下江聲哀。
山頭日日風雨惡，

一作落

江上不見行人回。空山亭亭幾朝暮，
獨一作猶記行

人去時路知君渡河長不歸恨不當年逐君去此身化

石千仞礪石猶可轉

一作懸

心不移長江水涸黃埃飛行

人應有歸來時

一作期

姑蘇臺

麋鹿應知易代頻吳趨誰唱不堪聞捧心臺暗梨花月

扶目門深薜荔雲江闕水犀歐冶劍氣騰金虎闔廬墳

計然已死鴟夷逝寂寞五湖西日曛

燕中懷古

荆卿墳上草離離
郭隗臺前對落暉
戰國山河秋氣肅
中原豪傑曉星稀
乾坤納納無人識
南北年年有鴈飛
誰似盧溝橋畔柳
安排青眼送將歸

項炯可立集

炯字可立台之臨海人
端行績學通羣經大義
為時名儒晦迹不仕
一時名公碩士若金華黃
潛晉卿晉寧張翥仲舉
輩多從之游嘗居吳中
甫里書院時與玉山唱
和其古樂府如吳宮怨

公莫舞空井辭江南弄等篇酷似李長吉惜其
詩不多傳云

感秋六首

南風久不作囂侵曉中天龍文裏羸狩熊羆散如煙萬
蟻赴墜蜨捷如下瀧船誰當昭若蒙凍闕栖枯蓮

劉項龍虎爭遺民盡瘡痍故掾入收律諸將醉斫柱四
老亦強出兩生終不起三王盛禮樂竟為呂政燬烏乎
百代下汲汲豈無意

洛陽少年人英風振四方三表與五餌可以給中行胡
為慟歲餘不一試而亡曾顏雖魯愚豈曰終荒唐天才
何代無養之當有方

班超負奇氣投筆西出關風塵髀肉消日月鬢毛斑苟
可利吾國何必求生還偉哉馬伏波竟死壺頭山

雲雨手翻覆越盟久已寒尺布與斗粟意態尤可憐狂
奴豹隱霧故人龍在天鶴書訪羊裘賤貴何足言

今年深入山逝將同木石時讀古人書撫髀成感激顏

生雖陋巷易地亦禹稷彬彬韶輅冕損益文與質杜陵
安知此妄語同盜跖哀哉疇我晤長林月如漆

空井辭

石蘭古蘚青連錢老梧石罅孤根懸下有一斗琉璃泉
轆轤不鳴修綆斷蛛網濛濛梧葉乾

江南弄

篁深雨過月色青濕螢幾點風穿櫺秋聲滿江龍一吟
江空漠漠懸疎星鳳凰城頭石花吐雷擊老樹蛇骨腥

鬼雄騎黿潮際上暗藤如山走漆鐙

吳宮怨

繡楣灑黃粉椒壁漲紅青倚簷樹如鬼深草蛇夜鳴

髀已無淚古恨埋石肩

鐵雅評曰十字惜過牛鬼髀髀無淚尤勝無語

公莫舞

龍蟠錦帳金奕奕虎旗無際人馬立肉林垂益陵阜赤
萬甕行酒晴虹濕大蛇中斷狂魄滅重瞳無光射寶玦
雷憤風愁三尺鐵河山未必如瓜裂老荒捭珥語公莫

頭上青天懸日月

鐵雅評曰錦囊子有奇語無此奇氣

妾所安居

北風玉燕落雲際
曲屏夜渺紅冰碎
守宮不滅腕痕香
蕙帳垂垂雙錦帶
杜鵑聲裏發珠林
黃葉夢中行紫塞
防秋舊校馬如狗
繡鹿毳袍新樣製
芳魂一點渺何棲
煙雨菰蒲大江外

題趙子固水仙

龍波乍起湘雲濕
帝子欲歸歸不得
十二煙鬟點遙碧

到今愁魄寄湘花
畫出深愁雲繞筆

題趙子固蘭菊

涼雲如波散銀浦
飛虹不見行天鼓
野花幽草一團春
暝天相倚愁殺人

宿鳳皇山上方懷古四首

夜豁山窓坐次寥
一尊月下酹江濤
縱橫龍尾霜痕斷
彷彿虎牙雲氣高
誰云魂魄猶思沛
細看荃蘅忍反騷
百五十年真夢耳
古槐殘蟻黑於毛

石壁削下三千尺挂我雙屐栖林廬潮聲夜半起天末
月色秋高照雨餘禪榻了無羅綺夢酒家或見鳳鸞書
塔根蘚骨化黃土寧使人間瘡鬼除

江左夷吾浪得名豫州英槩亦沈冥夕陽遠一作枯樹山

如赭秋雨荒臺草更一作自青漢苑玉魚誰復葬昭陵石

馬已無靈可憐白髮商人婦猶向鐙前話一作唱後庭

楚聲四一作夜起國殤一作殘悲運盡東南事可知塞下一作

上徑一作竟推金馬去草一作塚間俄見石鯨一作鱗隳祝宗

端合

一作只

先祈死丞相空聞後出師落日半江秋寂寞

乳鴉啼

一作猶

繞萬年枝

即事

江南水濶疑無地漢北風高忽似秋
鴻鴈定應驚悄悄麒麟何許泣幽幽
步兵阮籍唯耽酒隱士龐公不入州
敢饜朝盤惟首簪封侯渾是爛羊頭

送袁孟敏歸潭

吳門送客折楊柳迢遞郵亭短復長
五月海雲應未熟

孤舟江雨定微涼
春濃乳酒浮鵝鵝
夜冷牙牀攬鸛鵒
歸到故園無限樂
小山招隱莫須忙

次韻鄧祭酒贈極元無師

麈尾天花灑石扉
莫教五色掩摩尼
峰頭笑縱金衣鶴
竹裏閒尋玉版師
言論每懷龍井夜
扶携渾似虎谿時
芝雲更擬分蒲榻
黃葉滿山題近詩

題堊秀堂

霞際浮玉青霏霏
吳中景物天下稀
三江入海作秋浪

五湖滿地搖夕暉孤鶴忽與白鷺起神龍或挾赤鱗飛
胡牀抱膝但長嘯丈夫安得為輕肥

築室湖灣種花柳掃雲巖阿坐薜蘿曉雨紅披黃鳥路
春風綠漾白鷗波招隱誰看大山賦扣舷自作小海歌
莫收俗物挂眼底由來勝事吳中多



元詩選三集卷五